

## ԿԱՐԾԻՔ

### Նունե Ալբերտի Մինասյանի

«1960-1980 թվականների հայկական գրքային գրաֆիկան»

թեմայով ատենախոսության վերաբերյալ, ներկայացված

ԺԷ.00.03- «Կերպարվեստ, դեկորատիվ և կիրառական արվեստ, դիզայն»

մասնագիտությամբ արվեստագիտության թեկնածուի գիտական աստիճանի  
հայցման համար

Նունե Մինասյանի ատենախոսությունը նվիրված է հայկական գրաֆիկայի կարևոր բնագավառներից մեկի՝ 1960-1980-ական թվականների հայկական գրքարվեստի համալիր ուսումնասիրությանը:

Ատենախոսության մեջ առաջին անգամ առանձին ուսումնասիրության նյութ է դարձել հայ կերպարվեստի համար բեղմնավոր այս ժամանակահատվածում լույս տեսած գրքերի գեղարվեստական ձևավորումը:

Այդ շրջանում, ինչպես գրում է ատենախոսը, տվյալ ոլորտում «աշխատել են հարյուրից ավել հայ արվեստագետներ, և նրանց բոլորին, բնականաբար, անհնար կլիներ տեղ հատկացնել մեկ, թեկուզև ընդարձակ աշխատության շրջանակներում» (էջ 4): Դա է պատճառը, որ ատենախոսն առանձնացրել է այն վարպետների ստեղծագործությունները, որոնցում առավել վառ դրսևորում են գտել ուսումնասիրվող ժամանակաշրջանի հայ գրքարվեստի, գրքի գեղարվեստական ձևավորման էական տարրերիչ հատկանիշները:

Հետազոտության ընթացքում Նունե Մինասյանը փորձել է հնարավորինս հստակ բնութագրել նկարիչներից յուրաքանչյուրի անհատական ոճն ու ստեղծագործական ձեռագիրը: Միաժամանակ նա ուսումնասիրվող հուշարձանները դիտարկել է դրանց ընդհանրության և տարբերության տեսանկյուններից, իսկ հեղինակներին դասակարգել ըստ գործունեության տարիների և ոճական մոտեցումների: Դիմելով միևնույն գրական երկի հրատարակությունների և ձևավորումների համեմատությանը, դիսերտանտը շրջանառության մեջ է դրել ոչ միայն լայն հանրությանը, այլև մասնագետներից շատերին անձանոթ կամ մոռացության մատնված գրաֆիկական մի շարք ստեղծագործություններ՝ առաջին անգամ վերլուծության ենթարկվելով, մասնավորաբար, գրքարվեստի ասպարեզում

տարիներ շարունակ աշխատած Վաղինակ Մանդակունու և Միհրան Սոսոյանի ստեղծագործությունները:

Ատենախոսությունը բաղկացած է ներածությունից, երեք գլխից, եզրակացություններից, օգտագործված գրականության ցանկից և հավելվածներից՝ խնամքով ընտրված վերատպություններից ու բարեխղճորեն կազմված՝ սե-սպիտակ մանր պատկերներով ուղեկցվող, դրանց վերնագրերը, ստեղծման տարեթվերը, կիրառված նյութերն ու տեխնիկաները և գտնվելու վայրը մատնանշող կատալոգից, որը տեղեկատվական ինքնուրույն արժեք ու նշանակություն ունի: Խորհուրդ եմ տալիս ատենախոսին հետագայում այն ընդարձակել, լրացնել գրքարվեստի ասպարեզում այդ տարիներին աշխատած՝ քիչ թե շատ վաստակ ունեցող այլ արվեստագետների ստեղծագործություններով և հրատարակել առանձին գրքով:

Ատենախոսության առաջին գլուխը նվիրված է 1960-1980-ական թվականների պատմամշակութային կարևոր իրադարձություններին, ինչպես նաև գրքի ձևավորման հիմնական սկզբունքներին ու ոճական առանձնահատկություններին: Ատենախոսն առանձին ենթագլուխներով շարադրել է 1960-1980-ական թվականների պատմական համառոտ ակնարկը՝ ներկայացնելով տվյալ տասնամյակների քաղաքական ու մշակութային կյանքի ընդհանուր պատկերը: Ապա Նունե Մինասյանը քննության է առել 1960-1980-ական թվականների հայկական գրքի ձևավորման հիմնական սկզբունքները, այնուհետև՝ անդրադարձել մատենաշարերի ձևավորումներին:

Երկրորդ՝ «Ավագ սերնդի արվեստագետների գրքային ձևավորումները» վերնագրով գլխում ատենախոսն ուսումնասիրել է 1930-1950-ական թվականներին գեղարվեստական ասպարեզ իջած և իրենց ձևավորումներում առավելապես դասական արվեստի ավանդույթների վրա հենված ութ արվեստագետների՝ Աշոտ Մամաջանյանի, Կարապետ Տիրատուրյանի, Արա Բեքարյանի, Էդուարդ Իսաբեկյանի, Խաչատուր Գյուլամիրյանի, Արտաշես Հունանյանի, Գրիգոր Խանջյանի և Միհրան Սոսոյանի աշխատանքները:

Երրորդ՝ «Նոր սերնդի արվեստագետների գրքային ձևավորումները» վերնագրով գլխում ատենախոսը քննության է առել 1950-ական թվականներից ստեղծագործած և իրենց ձևավորումներում ավագ գործընկերների փորձին ու գրքարվեստի դասական և մոդեռնիստական ուղղություններին դիմած ինը

գրաֆիկների՝ Վաղինակ Մանդակունու, Ալեքսանդր Գրիգորյանի, Լիդա Խանամիրյանի, Աիդա Բոյաջյանի, Կարեն Սմբատյանի, Հենրիկ Մամյանի, Ալբերտ Յարայանի, Անդրանիկ Կիլիկյանի և Արա Բաղդասարյանի գրքային ձևավորումները:

«Եզրակացություններ» բաժնում ամփոփված են ուսումնասիրության հիմնական արդյունքները:

Կարծում եմ, որ Նունե Մինասյանին հաջողվել է իրականացրել իր առջև դրված խնդիրները՝ ներկայացնել 1960-1980-ական թվականների հայ գրքային գրաֆիկայի ամբողջական պատկերը և բացահայտել դրա պատմական արմատները, գեղարվեստական առանձնահատկություններն ու միտումները:

Ակնհայտ է աշխատության գործնական նշանակությունը՝ հետազոտության արդյունքները կարող են հիմք դառնալ նմանատիպ նոր ուսումնասիրությունների համար և ընդգրկվել բուհական դասընթացներում, ինչպես նաև օգտակար լինել գրքի ձևավորմամբ զբաղվող գրաֆիկների համար:

Ատենախոսության հիմնական դրույթներն արտացոլված են վեց տպագիր հոդվածներում: Սեղմագիրը համապատասխանում է ատենախոսությանը:

Բարձր գնահատելով Նունե Մինասյանի և նրա գիտական ղեկավարի՝ արվեստագիտության թեկնածու Արթուր Ավագյանի երկարատև բարեխիղճ աշխատանքի հանրագումարը հանդիսացող սույն աշխատությունը, գտնում եմ, որ այն կարող է հրատարակվել փոքր-ինչ ընդլայնված ու լրամշակված տեսքով:

Միևնույն ժամանակ ունեմ մի քանի նկատառումներ: Անդրադառնալով ատենախոսության թեմային վերաբերող գիտական և մասնագիտական հրապարակումներին (էջ 5-7)՝ Նունե Մինասյանը շրջանցել է ատենախոսության վերջում՝ Օգտագործված գրականության ցանկում ընդգրկված՝ «Ինչպես է ստեղծվում գիրքը» (Երևան, Զանգակ-97, 2010) մենագրությունը, որի հեղինակը գծանկարիչ Արա Բաղդասարյանն է՝ սույն ատենախոսության «հերոսներից» մեկը: Նշված մենագրությունը չի հիշատակվում նաև Արա Բաղդասարյանի ստեղծագործական կենսագրությանը նվիրված ենթագլխում (էջ 103-106):

Ատենախոսության առաջին գլխում՝ ուսումնասիրվող նկարազարդումները ոճական-ձևաբանական առումով չորս խմբի (ավանդական կամ ակադեմիական, միջնադարամետ, նորարարական և ծաղրանկարչական) բաժանելուց հետո Նունե

Մինասյանն անցնում է վերջին՝ ծաղրանկարչական խումբը ներկայացնող արվեստագետներ Գեորգի Յարայանի, Վլադիմիր Աբրոյանի և Սերգեյ Արուտչյանի ստեղծագործությունների քննարկմանը, այնինչ մնացած խմբերը ներկայացնող վարպետների գործերը նա լուսաբանում է հաջորդ՝ երկրորդ և երրորդ գլուխներում: Կարծում եմ, որ շարադրանքի տրամաբանությունը պահպանելու համար վերոհիշյալ նկարիչներին ևս հարկ էր անդրադառնալ այդ գլուխներում՝ ավագ և նոր սերնդի մյուս արվեստագետների հետ մեկտեղ:

Ատենախոսության առաջին գլխի տողատակերից մեկում (էջ 12) մեկնաբանելով «սոցիալիստական ռեալիզմ» հասկացությանը՝ ատենախոսն այն բնութագրում է որպես «գեղարվեստական ուղղություն», մինչդեռ դա ուրույն *ստեղծագործական մեթոդ է:*

Ատենախոսության տարբեր գլուխներում (էջ 23, 25, 31 ևն) հանդիպում են գրքի գեղարվեստական ձևավորման առանձնահատուկ տարրերի և բաղադրիչների օտարալեզու անվանումները՝ *ֆրոնտիսպիս, ավանտիպուս, շմուցտիպուս, ֆորզաց* և այլն: Ճիշտ կլիներ գոնե փակագծերում տալ դրանց հայերեն համարժեքները՝ *ճակատաթերթ, նախատիպողու, տիպողուսար, կազմատակ* և այլն:

Խոսելով 1960-1980-ական թվականների մշակութային կյանքում տեղի ունեցած նշանավոր իրադարձությունների, այդ տարիներին հիմնադրված գեղարվեստական կարևոր օջախների մասին և թվարկելով տվյալ շրջանում ստեղծագործած վաստակաշատ արվեստագետների անունները (էջ 10-15)՝ անհրաժեշտ էր հիշատակել նաև Մարտիրոս Սարյանի՝ 1967-ին դռները բացած թանգարանն ու նշել կինոռեժիսոր Արտավազ ֓ելեշյանի և քանդակագործ Արտո Չաքմաքչյանի անունները:

Ատենախոսության երկրորդ գլխի վերջում Նունե Մինասյանը գրում է. «...դեռևս 1922 թվականին հայ ժողովրդական բանահյուսության այդ հուշարձանին (նկատի ունի «Սասունցի Դավիթ» էպոսը – Ա.Ա.) անդրադարձել էր Հակոբ Կոջոյանը, որի երեսունհինգ դրվագից բաղկացած գրաֆիկական կոմպոզիցիան հիմք հանդիսացավ հետագայում ստեղծված մի շարք հորինվածքների՝ օրինակ, Երվանդ Քոչարի կերտած հայտնի արձանի համար» (էջ 65): Որպես Երվանդ Քոչարի ստեղծագործությանը, այդ թվում նաև «Սասունցի Դավիթ» հուշարձանին իմ հեղինակած գրքերում ու հոդվածներում բազմիցս անդրադարձած մասնագետ՝

կարող եմ համոզված ասել, որ Հակոբ Կոջոյանի և Երվանդ Քոչարի այդ երկու գործերի միջև չկա որևէ՝ թեկուզ հեռավոր ընդհանրություն: Դրանք իրենց գեղարվեստական մտահղացմամբ, պատկերագրությամբ ու ոճով միանգամայն տարբեր աշխատանքներ են:

Վերը բերված նկատառումները բնավ չեն նվազեցնում կամ հարցականի տակ դնում ատենախոսության գիտական արժեքը: Ուստի գտնում եմ, որ Նունե Ալբերտի Մինասյանի «1960-1980 թվականների հայկական գրքային գրաֆիկան» թեմայով ատենախոսությունն իր գիտական պատշաճ մակարդակով լիովին համապատասխանում է Հայաստանի Հանրապետությունում գիտական աստիճանաշնորհման կանոնակարգի 7-րդ կետի՝ «գիտության տվյալ բնագավառում կարևոր նշանակություն ունեցող խնդրի լուծում» պայմանին, իսկ ատենախոսը միանգամայն արժանի է ԺԷ.00.03 – «Կերպարվեստ, դեկորատիվ և կիրառական արվեստ, դիզայն» մասնագիտության գծով արվեստագիտության թեկնածուի գիտական աստիճանի շնորհմանը, ինչի համար էլ միջնորդում եմ ՀՀ ԳԱԱ Արվեստի ինստիտուտի 016 մասնագիտական խորհրդի հարգարժան անդամներին:

**Պաշտոնական ընդդիմախոս՝**

**ՀՀ ԳԱԱ Արվեստի ինստիտուտի տնօրեն,**

**ՀՀ ԳԱԱ թղթակից անդամ,**

**արվեստագիտության դոկտոր, պրոֆեսոր՝**



**Արարատ ԱՂԱՍՅԱՆ**

ՀՀ ԳԱԱ Արվեստի ինստիտուտի տնօրեն, ՀՀ ԳԱԱ թղթակից անդամ, արվեստագիտության դոկտոր, պրոֆեսոր Արարատ Աղասյանի ստորագրությունը վավերացնում եմ՝

**Արվեստագիտության 016 մասնագիտական խորհրդի գիտքարտուղար՝**

**ՀՀ ԳԱԱ Արվեստի ինստիտուտի տնօրենի տեղակալ,**

**արվեստագիտության դոկտոր, պրոֆեսոր՝**



**Աննա ԱՍԱՏՐՅԱՆ**

**11 օգոստոսի 2020թ.**